

հանաները կը պարզեատրէ ծաղկեայ փիլոններով և գլխու գօտիններով ու Երեմիայի կ'ընծայէ «մի փէշկիր մահրամա շինած» :

Հետեւեալ օրը, Ապրիլ 27 Չորեքշաբթի, կաթողիկոսը կը մեկնի Կ. Պոլսէն ու կ'երթայ Ներսէս հայրապետի կղզին (Սիվրի ատա) : Իրեն յուզարկ գացողներուն մէջ է նաև Երեմիա : Գիշերը այդ կղզին կ'անցընէ ու օրհնելով զինք ուղևորելու եկողները՝ կը մեկնի Պրուսա, ու Երեմիա իր ընկերներով յաջորդ օրը կը դառնայ Կ. Պոլիս :

Կաթողիկոսը մինչև Մայիս 25 կը մնայ Պրուսա՝ հիւր տեղւոյն անուանի ազգային Անտոն Չէլէպիի : Տէր Մարտիրոս լսելով հայրապետին հոն յամենալը՝ իր զաւկին Երեմիայի, նաև Ոսկան երէցի ու Ներսէս վարդապետի Ներսէսին հետ Մայիս 16ին կ'ելլէ Կ. Պոլսէն ու հետեւեալ օրը երեկոյին կը հասնի Պրուսա. տեղացիք կը տանին զիրենք Անտոն Չէլէպիի տունը : Կաթողիկոսը յաջորդ օրը դառնալով Անտոն Չէլէպիի մեծ տունէն՝ պատուով կ'ընդունի զիրենք ու քովէն չի հեռացներ Տէր Մարտիրոսը. իսկ Երեմիա կը հիւրընկալուի քաղաքի Պետրոս երէցէն, որուն ծանօթացած էր Երուսաղէմի մէջ իր ուխտի դացած տարին : Մայիս 21ի Շաբաթ երեկոյին ուշ ատեն լուր կը բերեն թէ Պրուսա եկած է Դաւիթ Արևելցի, այն՝ որ յառաջագոյն չորս անգամ պատրիարք եղած էր Կ. Պոլսոյ : Այս անգամ, կը գրէ Երեմիա, անիկա գացած էր Իզնիմիտ՝ անկէ կրկին մայրաքաղաք երթալու և նորանոր յուզումներ պատճառելու զիտումով : Երբ Կ. Պոլսեցիք կը լսեն Արևելցիի մէջտեղ ելլելը՝ վեց եկեղեցիներու աթոռակալները Իզնիմիտ կը զըրկեն, որպէսզի բռնագատեն զայն ետ կենալու Կ. Պոլիս երթալու նպատակէն ու խորհուրդ տան որ երթայ միա-